



الحمد لله، وأشهد أن لا إله إلا الله وحده لا شريك له، وأشهد أن محمداً عبده ورسوله- صلى الله عليه وسلم- أما بعد.

مرحباً بكم في لقاء جديد، ولايف جديد من لايفات يوم الإثنين أسأل الله أن يبارك فيكم وعليكم، وأن يرضى عنكم اللهم آمين.

باختصار شديد، نحن اليوم مجتمعون؛ لنفضض مع بعضنا على اعتبار أننا لدينا نفس المشكلة، ما هي المشكلة؟!

أننا كلنا أصبحنا أكثرنا تقريباً يتفرج على الحج كأنه يتفرج على شيء خيال؛ أسعار غير طبيعية، الحج يبدأ من مائة ألف ومائتي ألف جنيه.

كيف يطلع أسرته أو يطلع زوجته أو يطلع بناته، أو طالب(ة) في جامعة يشترط ليطلع يحج، أضحي الموضوع - بالنسبة له خيال علمي- ولكن ربنا على كل شيء قدير.

وقد رأينا قصصاً كثيرة للحج كانت قصص عجيبة لا أحد يصدق أبداً أن الشخص هذا كان يمكن يحج -في يوم من الأيام- لكن أملنا في الله كبير، ورجاءنا في الله- سبحانه وتعالى- كبير، لكن هذا الموسم -الواحد- متأكد أنه لن يطلع تقريباً إلا يوم الذي تبدأ المناسك، ويوم ما نرى بأعيننا الحجاج وهم لابسون ملابس الإحرام، الكاميرات تُصورهم في منى، وبعد ذلك تُصورهم في عرفة، وبعد تُصورهم بمزدلفة، وبعد ذلك تُصورهم في الإفاضة؛ ساعتئذ القلب يتقطع ويكون متأثر، وكان يتمنى أن ربنا يرضيه، ويكتب له الحج..

تخيلنا هذا ولازلنا شباباً، تخيل الأكبر منا الذي سنه كبير يبلغ

الستينات والسبعينات؛ كيف ألمه وأكبر بكثير ترى والدتك ترى جدتك وترى جدتك.. وهو يتفرج على المناظر هذه كل سنة، ويبكي وكان نفسه أنه يقدر..

كلّ لمّا يتقدم بنا العمر، كل سنة نعزي نفسنا ولكن نحاول كل سنة نقول للناس ما هي الأعمال التي تعطي الأجر ونحن لا نحتاج سوى الأجر لكن طبعاً الأعمال التي سأقولها لا تسقط عن الفرد الحج لكن الفريضة مستمرة ما دام توفرت الاستطاعة المادية والبدنية يستطيع يذهب إلى الحج لكن ربما سبحانه وتعالى بكرمه وفضله جعل هناك أعمال معينة في الإسلام تساوي أجر الحج ولكنها لا تغني عن حجة الإسلام، ولكن الإنسان يظل مطالب بحجة الإسلام لكن الإنسان لو فعل هذه الأعمال تساوي الحج..

■ **العمل الأول:** الذي نرجوا من الله أن نكون جميعاً فيه أول عمل صدق النية في الأداء الحج هذا العام .

والله صدق النية يعطى أجر الحج أي أجر الحج وإن فاتته الوقوف بعرفه أو بمنى أو الطواف بالبيت؛ لأن النبي صلى الله عليه وسلم بين ذلك في أمر عظيم في الإسلام قال من صدق الله الشهادة بصدق بلغة الله منازل الشهداء وإن مات على فراشه وإن كان أجر الشهادة أعظم أجور الإسلام والجهاد هو ذروة سلام الإسلام يمكن أن ينال في البيت إن كان الإنسان أراد ذلك بصدق وأطلع الله على قلبه فوجده صادق بهذا الأمر؛ فإن الله يكتب له أجر الشهيد فإن من باب أولى الحج إن كان الإنسان صادق وحاول إنه يطلع الحج ثم عجز سواء مادياً أو بدنياً أو القرعة مجتث عليه أو كانت فلوسه علي قد حج القرعة واسمه مطلعش، كان نفسه يطلع ونوى وعزم وصدق نرجوا من الله أن يكتب له الأجر كامل لا ينقص من أجره شيء، فده السبب الأول.

وتعلمون أن النبي صل الله عليه وسلم وهو راجع من غزوة تبوك قال جملة خطيرة جداً تكتب بماء الذهب قال:

"إن قوماً بالمدينة ما سرتم مسيراً ولا قطعتم وادياً إلا كانوا معكم حبسهم العذر".

فبين صل الله عليه وسلم إن في ناس خدوا نفس الأجر زينا بالظبط لكن وهما قاعدين في البيت، إزاي؟ قال: **حبسهم العذر.**

اللي هما ربنا ذكرهم في القرآن قال :

{ولا علي الذين إذا ما أتوك لتحملهم قلت ما أجد ما أحملكم عليه تولوا وأعينهم تفيض من الدمع حزناً ألا يجدوا ما ينفقون}
من علامات الصدق:

✓ الحزن الشديد على فوات العباداة، الحزن ده لما بنشوفه في جدتك مثلاً المشهد ده بيتكرر كل سنة تبقى هي بتتفرج على الناس في عرفه وهي بتبكي، كلنا عندنا المشهد ده هتلاقيه في أمك في جدتك لازم في كل بيت في المشهد ده كل سنة بيتكرر المشهد ده حد تلاقيه كده وإحنا قاعدين في أمان الله وفاتحين بنتفرج علي الشعائر تلاقي في حد ببيكي مع نفسه كده في أي يا حجة مالك تقولك مفيش يا بني كان نفسي أكون هناك..

هما دول الصادقين في طلب الحج وهما دول اللي نرجو من الله أن يكتبوا في الحجيج هذا العام، الصادقون.. الصدق مش سهل يا جماعة لا ده حاجة شغلاك حاجه طول النهار بتفكر فيها هما دول الصادقين اللي زعلانين فعلاً إنهم ما راحوش يحجوا، بل قد يكون أجر الصادق هنا أعظم من أجر اللي راح، إزاي؟

واحد راح يحج ولكن ما عنده دين ما عنده تقوى ما عنده حضور قلب رايح كده بشكل روتيني وواحد هنا قلبه بيتقطع ونفسه يوصل

للحرم .

لذلك الشاعر يقول في هؤلاء:

يا راحلين إلي البيت العتيق لقد سرتهم جسوماً وسرنا نحن
أرواحاً إنا قعدنا علي عذر ومن قعد علي عذر كمن راح.

وكانوا يقولون:

كم قاعد في بيته وقلبه يطوف حول الكعبة بل كم قاعد في بيته
وقلبه يطوف حول العرش.

- يبقى أول حاجة الصدق، الصدق في طلب هذا الأمر.
- **الحاجة الثانية:** بس دي هتبقى للرجال الأجر ده للرجال قال:
أن يحافظ الرجل على صلاة الفريضة في المسجد.

فقد قال صل الله عليه وسلم:

"من خرج من بيته متطهراً إلى صلاة مكتوبة فأجره كأجر
الحاج المحرم".

يبقى الشرط ما يتوضأ في المسجد لأ. تطلع من بيتك متوضي
لأن ده بيدل على الاهتمام والعناية.

إلى صلاة مكتوبة: يعني فريضة يبقى مش نافلة.

فأجره كأجر الحاج المحرم: يعني اللي هو متلبس كمان بالحج.
حفاظ الرجل على الصلاة في المسجد تخيلوا طب هو بيطلع لكم
صلاة مكتوبة في اليوم؟ خمسة. يا سلام! يعني أنا ممكن في اليوم
الواحد إني أخذ الأجر ده خمس مرات؟ نعم.

لأنه في الحقيقة هو عمل زي الحج.. خرج من بيته الثاني خرج من
بيته برضه والثاني خرج لحج وده خرج لبيت الله سبحانه وتعالى.
اللي يقدر يروحه..، ده خرج لبيت الله الحرام خرج لبيت الله هو لو

كان يقدر يروح البيت الحرام كان راح لكن هو اللي قدر عليه
يروح بيت الله الذي هو بجواره.. فحصل تشابه بين الاثنين فحصل
تشابه في الأجر.

طيب النساء نرجو من الله أن تكون محافظتها على صلاتها في
بيتها في الوقت سبب إنها تأخذ أجر كبير.. لأننا عارفين إن صلاة
المرأة في بيتها أفضل من صلاتها في المسجد، فإذا كان ده أجر
الرجل إذا ذهب إلى المسجد فنرجو أن يكون للمرأة أجر مقابل أو
أجر قريب من ذلك إذا حافظت على الصلاة في أول الوقت في
بيتها.

■ **السبب الثالث:** قال صلى الله عليه وسلم: "من صلى الفجر
في جماعة أو في رواية "من صلى الغداة في جماعة ثم
قعد يذكر الله تعالى حتى تطلع الشمس ثم صلى ركعتين
كان له كأجر حجة وعمره تامة تامة تامة".

وهذا الأجر والله أعلم أيضاً يختص بالرجال؛ لأنهم المخاطبين
لصلاة الجماعة ابتداء بذهب على المسجد لازم تكون الصلاة دي
تكون في جماعة في المسجد... يذهب إلى المسجد يصلي ثم يقعد
في مصلاه يذكر الله تعالى حتى تطلع الشمس ثم يصلي ركعتين
يأخذ أجر حجة وعمره تامة تامة تامة... ده ممكن يعمل كل يوم.
طبعاً النساء اللي بتسأل لهم حديث لوحدهم في الآخر المرأة بالذات
هيبقى لها حديث في نمرة عشرة بقى معي هيبقى نمرة عشرة
حديث مفاجئ هيفاجئ النساء هيضرب كل ده.. هتاخذ كل الأجر
دي في حاجة واحدة بس.

عشان ناخذ أجر حجة بس دي برضه مشكلتها إني لازم أروح
هناك برضو عند الحرم.. وهي يعني لو أن إنسان عجز والله نرجو
برضو احنا بنقول نرجو للمرأة إذا صلت في بيتها وجلست في

مصلاها تذكر الله حتى تطلع الشمس ثم صلت ركعتين نرجو لها.... وإن كان ظاهر الحديث إن الكلام على الرجال الذين يصلون في المساجد بس زي ما قلنا المرأة هيبقى لها حاجة لوحدها كده جاية يعني.

■ **السبب الرابع:** سبب يخليك تاخذ أجر حجة مع النبي صلى الله عليه وسلم، لو إنسان عجز إنه يطلع يحج يحاول إذا كان مثلاً إمكانياته المادية معاه فلوس بس مش كثير مش لدرجة الحج.

هذا الحديث ليس بضعيف الذي ذكرته لكم وإنما صححه أو حسنه الإمام الألباني ونحن نقلد الإمام الألباني طبعاً لو غيره من العلماء ضعف الحديث على راسنا من فوق ولكننا نقلد الإمام الألباني في اختياراته وبالتالي هذا الحديث عندنا عليه العمل.

طيب احنا بنقول لو واحد معه فلوس محدودة بس هي ما تكملش حجة يعني يحاول يحاول إنه يعمل عمرة في رمضان على قد فلوسك بقى.. هي برضو عمره رمضان غالية جداً يعني عمرة في رمضان، دلوقتي مش هتقل عن خمسين ألف جنيه للأسف.. بس بنقول لو واحد معه ما عهوش مية وخمسين آآ معه خمسين.. فإلي يقدر عليه يعمل عمرة فلو أنت تقدر بقى تخلي العمرة دي في رمضان بس عايز أقول لك بقى.

النبي ﷺ:

(قال عمرة في رمضان تعدل حجة معي).

ده بقى احنا كده في العالي خالص عشان دي مكلفة طبعاً دي مش هتبقى زي الصلاة ف الجماعة أو الجلوس للشروق ده دي محدودة شوية. فأجره أجر حجة لكن عمرة في رمضان هتكلف فيها مشقة في تعب أكثر فإلزام الأجر يكون أكبر والتشويق يكون أعلى فقال صلى الله عليه وسلم حج في رمضان عمرة في رمضان تعدل حجة

معي...

طبعاً تخيل تحج مع النبي عليه الصلاة والسلام والنبي حج حجة واحدة وقاعدين كلنا يعني بنستفيد منها وبنحسد كل الناس اللي كانوا معاه في الحجة دي، فتخيل إنك تطلع حجة مع النبي عليه الصلاة والسلام، طيب إذا عجزت معك فلوس محدودة يعني هي مش محدودة قوي بس يعني نعتبرها محدودة ويا دوبك هتطلع عمرة فحاول تخليها في رمضان بحيث إنك تاخذ أجر حجة مع النبي صلى الله عليه وسلم. سبحان الله أعلم.

■ السبب الخامس: الحفاظ على الأذكار بعد الصلوات المكتوبة.

قصة الفكرة:

إن فقراء الصحابة ذهبوا إلى النبي صلى الله عليه وسلم وقالوا: يا رسول الله ذهب أهل الدسور بالأجور.. الدسور اللي هي الأموال يعني بياخدوا أجر أكبر منا، النبي عليه الصلاة والسلام قال لهم: إيه المشكلة؟ قالوا يصلون كما نصلي يصومون كما نصوم ولكن لهم فضل وأموال معهم فلوس كتير يحجون ذلك يحجون ويعتمرون ويجاهدون ويتصدقون، فقالوا له الناس سبقونا احنا بيصلوا زينا بيصوموا زينا لكن عندهم فلوس زيادة بيقدروا يحجوا ويعتمروا ويجاهدوا ويتصدقوا فقال صلى الله عليه وسلم إلا أدلكم على أمر إذا فعلتموه أدركتم من سبقكم ولم يدرككم أحد بعدكم وكنتم خير من أنتم بين ظهرائيه إلا من عمل مثله.

قال:

"أَلَا أُحَدِّثُكُمْ إِنْ أَخَذْتُمْ أَدْرَكْتُمْ مَنْ سَبَقَكُمْ وَلَمْ يُدْرِكْكُمْ أَحَدٌ بَعْدَكُمْ، وَكُنْتُمْ خَيْرَ مَنْ أَنْتُمْ بَيْنَ ظَهْرَانِيهِ إِلَّا مَنْ عَمِلَ مِثْلَهُ."

قالوا له: قل لنا ايه الحاجة اللي تخلينا نعدي الناس دي؟

قال صلى الله عليه وسلم:

"تُسَبِّحُونَ وَتَحْمَدُونَ وَتُكَبِّرُونَ خَلْفَ كُلِّ صَلَاةٍ ثَلَاثًا
وثلَاثِينَ."

تحمدون.. تسبحون وتحمدون وتكبرون الله خلف كل صلاة ثلاثا
وثلاثين.

قال لهم لو عملتوا دي خلف كل صلاة.. هي دي الفكرة.. إنها مش
مرة! عشان كده بأقول لك هو الموضوع بيان سهل.. لأ، بس هو
مش سهل.

(كل صلاة).. هو اشتراط كل صلاة.

إذا اللي أصلاً مش محافظة على الصلاة طلعت برة الموضوع.
يعني لو واحدة بنت منكم مش بتصلي الفجر أصلاً هي طلعت برة
الموضوع ده أصلاً وآثمة طبعاً.. بتعمل كبيرة من أكبر أو تكاد
تكون أكبر كبائر الإسلام على الإطلاق كل يوم، فما تكلمنيش في
الحديث ده..!

أصلاً نبتدي نصلي وبعد كده نتفاهم.

فأولاً عندنا كذا واحد طلع برة الحديث ده؛ عشان ما نفتكرش
الموضوع سهل.

أولاً اللي مش محافظ على الصلاة يعني بتصلي صلوات في اليوم
والخمسة بتقع، بتجمع مغرب مع عشاء، بتجمع ظهر مع العصر
لما بترجع من الكلية.. كل دول برة.. برة الحديث.

شاب ما بيصلش الفجر في الوقت.. وقت الفجر يعني قبل الشروق
برة.. برة الحديث... أنت كده مش موجود معنا؛ لأن لازم دبر كل
صلاة.. دبر كل صلاة.

1. طيب ده أول واحد برة اللي مش محافظ على الصلاة مش

معنا.. مالکش الأجر ده.. ما تحاولش.. لو قعدت أربع

صلوات من خمسة تعمل كده لأ.. كل صلاة.

2. اللي بيحافظ على الخمس صلوات لكن لا هو ما قالش هنا

صلاة جماعة، وقال صلاة وخلاص. فدي يستوي فيها صلى

جماعة وما صلاش جماعة... ده اجر مستقل.

لكن واحد بيصلي الخمس صلوات، أو واحدة بتصلي الخمس

صلوات لكن مرة تختم الصلاة ومرة ما تختمش..؟ مش معنا...

خلاص مش موجود معنا ده في الحديث.

عشان كده قلت لكم هو الموضوع مش سهل، أنتم عارفين مشكلتنا

بعد الصلاة بيحصل إيه؟

بيحصل مائة ألف حاجة عشان تمنعنا من الأذكار دي، بتلاقي أول

ما نخلص صلاة لازم سبحانه الله حد ينط لك بيكلمك ما تعرفش ليه

يعني أنا عايز أقعد يا جماعة أختم الصلاة.. لو سمحتم أختم

الصلاة.

لأ.. هو سبحانه الله أول ما تقول السلام عليكم ورحمة الله السلام

عليكم ورحمة الله كل الدنيا عايزاك.. ماما تنادي عليك، أختك تنط

على كتفك، أخوك عايز يضربك، الراجل في المسجد طلبت معاه

يسألك سؤال دلوقتي، واحد عايز يسلم عليك قبل ما يمشي.. مش

سهلة.. مش سهلة.

الموضوع عايز حرب.. عايز أبقي صلب عشان أقدر أتماسك في

وسط المشغلة دي.

وأقدر أحافظ إنني أقدر أقولهم ماحدش يشغلني عنهم، لأن بيحصل

مشكلة واحنا بنقول رسالة لكل هؤلاء الناس اللي بيحرمونا من

الأجر ده: رحمونا ارحمونا، رفقاً بنا..

احنا بنضيع بسببكم يا ريت يعني اللي يكلمني بعد الصلاة بلاش
تكلمني بعد الصلاة على طول، أرجوك سبني أختم أنا عايز دقيقتين
بس أختم الصلاة أرجوك ما تحرمنيش من الأجر ده.

رسالة إلى الأخ والأخت اللي بينط على كتفك بعد الصلاة يعني لو
سمحت سيبيني ثلاثة دقائق وبعد كده ننط على كتاف بعض مش
هيحصل حاجة.

رسالة إلي ماما ممكن بس دقيقتين بس وهبقى معك إن شاء الله،
بس أختم الصلاة أبوس إيديكم أختم الصلاة.

أبوس إيديكم سيبيوني أختم الصلاة، احنا بنضطر نختمها واحنا
بنجري واحنا بنمشي وأنا بكلم العيال فاحنا بنكلم العيال وبتاع وأنا
برمي العيال من على كتفي يعني مش كده يا جماعة.

يعني يا جماعة عايزين نختم الصلاة؛ يعني أرجوكم نختم الصلاة
هو موضوع دقيقتين مش هيحصل حاجة، مش هتحس إن كل
المهام اللي في الدولة بتنتهار في الوقت اللي أنا بعد ما سلمت فيه
حصل زلزال وتسونامي.

بيحصل إن البيت كله بينفجر محتاجني وكل مشاكل الدولة حصلت
أول ما أنا سلمت وكلهم عايزيني دلوقتي وكل العيال عايزين يلعبوا
وكل المسجد عايز يسلم علي يعني مش كده؟

مش كده يعني الإنسان احساس. "الإنسان احساس" 😊؛ فالرحمة
شوية نفسي أختم كل الصلوات يعني والله أنا بختم الصلاة بمعاناة،
أنا طبعا عشان بصلي في مسجد ودايما في ناس بيتكلموا وناس
عايزني فأنا أعاني عشان أختم الصلاة، أنا بستخبي عشان أختم
الصلاة، أنا باختم الصلاة وأنا باتكلم وأنا باجري وأنا باطبطب وأنا
بأحضن وأنا بـ أبوس وأنا بأسلم مش كده يا جماعة.

يعني أرجوكم مشاكل الدولة ممكن تنتظر يعني، وممكن مشاكل الأمة تستناني الدقيقتين دول، بعد إذنكم يعني.

ممكن اللي بينط على كتفي يصبر شوية 😊؟ يعني هتعتدي، ممكن الموضوع هيجي يعني وماما يعني ماما تصبر برضه شوية.

المهم يعني أنا ليه كده؟ بأقول لكم كده لأن ده حقيقي، يعني احنا مشكلتنا إما بنسمع بعض الأحاديث بنظن إن تطبيقها سهل. لأ؛ الحديث ده تطبيقه من أصعب ما يكون، هو الأجر ده بالساهل، أنت بتأخذ أجر يساوي أعمال حج وعمرة وجهاد وصدقة: أنت فاكِر الموضوع سهل، أنت فاكِر الشيطان هيسيبك؟

ده هيبعت لك ورود العالم في الوقت ده عشانها: كل الأطفال وكل الرجال وكل الكوكب هيجي لك في اللحظة دي، هي معركة يعني أنا بتخيل إن أنا بعد ما أسلم كده بدماعي بقى بقعد أركز كده إزاي هنتصر في المعركة دي؟

أنا عايش بقى عايز دور المعركة أنا فعلاً في معركة هتحصل مع أشخاص هم طيبين مش قصدهم حاجة، بس أنا اللي بحارب دلوقتي أنا داخل بحارب إزاي هقول آية الكرسي؛ لأن آية الكرسي نفس الكلام النبي عليه الصلاة والسلام قال:

"من قرأ آية الكرسي دبر كل صلاة لم يمنعه من دخول الجنة إلا أن يموت".

يبقى إذا أنا لازم أعمل فيه حاجتين لازم كل صلاة يتقالوا، علشان الحديثين دول إن أقول آية الكرسي والتسبيح والتحميد والتكبير ثلاثة وتلاتين كل واحدة، وطبعاً بنختم بلا إله إلا الله وحده لا شريك له وكلكم عارفينها.

الموضوع مش بيبقى سهل. صح؟ ده في ناس من لحظة التشهد في البيوت في التشهد بيبقى في أطفال كده معينين عارفين ده التشهد،

ماما هتسلم؛ فبيبتدي بقى الاستهداف.. بتلاقي فيه اتنين على الكتف
هنا هوت وإحنا في التشهد؟

← عشان تعرف المنافسة الصحابة كانوا بيتنافسوا إزاي؟ الأغنياء
راحوا بقى سألوا هم إنتم كنتم بتعملوه عند النبي لا قولوا لنا، لا
مش هنقولكم، لا لازم نعرف، لا مش هنقولكم دي حاجة بتاعتنا
وفضلوا يحاولوا لحد ما عرفوا الي حصل.

راح الأغنياء عملوا زيهم، راح الفقراء إلي الرسول وقالوا له
الأغنياء عملوا زينا فسكت رسول الله صل الله عليه وسلم وقال:

(ذلك فضل الله يؤتيه من يشاء)

(صوم وصدقة وحج) كون الأغنياء ربنا منّ عليهم بحاجة زيادة،
ربنا له الحكمة في كل شيء.

■ السبب السادس: التبكير لصلاة الجمعة.

وفي الحديث روى سهل بن سعد الساعدي، قال: قال رسول الله
صلى الله عليه وسلم:

**(إن لكم في كل جمعة حجة وعمرة، فالحجة: الهجير للجمعة،
والعمرة: انتظار العصر بعد الجمعة)**

يعني المبادرة والذهاب مبكرًا للجمعة.

■ السبب السابع: قضاء حوائج الناس، ودي كل الناس فيها:

روى الإمام البيهقي بسنده عن علي بن حسين قال:

**(خرج الحسن يطوف بالكعبة، فقام إليه رجل فقال: يا أبا
محمد، أذهب معي في حاجة فلان، فترك الطواف وذهب معه،
فلما ذهب، قام إليه رجل حاسد للرجل الذي ذهب معه، فقال: يا
أبا محمد، تركت الطواف وذهبت معه؟ قال: فقال له الحسن:**

وكيف لا أذهب معه ورسول الله قال: من ذهب في أمر لأخيه المسلم، ففُضيت حاجته، كُتبت له حجة وعمرة، وإن لم يُقضَ كُتبت له عمره، فقد اكتسبت حجة وعمره، ورجعت إلى طوافي).

يعني بيقول له أنا خدت أجر حجة وعمره وبعد كده في الآخر اديني رجعت أكمل الطواف.

يبقى السعي في قضاء حوائج الناس يعدل حجة وعمره إذا قضيت حاجة الإنسان اللي أنت سعت فيه لك أجر حجة وعمره، وإذا لم تقضى -ذهبت وسعت في حاجته- ولم تقضى لك أجر عمره حتى لو لم تقضى وكفاية، إن الموضوع ده يعني أفضل من الاعتكاف في مسجد النبي عليه الصلاة والسلام الحديث:

"لأن أمشي مع أخي في حاجة...." هنيئاً لهؤلاء الناس الذين سخرهم الله لحوائج الناس.

فيه دايماً كده بنت في الشلة هي دي اللي كل البنات بيرموا عليها حمالهم، تلاقي دايماً أي واحدة عاوزة تروح حاجة تقولها ماتيجي معايا يا فلانة، عاوزة تشتري حاجة تقولها ما تيجي تساعديني أنا خايبه مابعرفش اشتري، عاوزة تذاكر ما تيجي تشجعيني على المذاكرة.. البنت دي ربنا يبارك فيها بجد هنيئاً لها إن ربنا جعلها في حوائج الناس ودايماً كل شلة فيها البنت دي معروفة.

وكل شلة فيها الولد ده الناس كلها دايماً بتعتمد عليه، تلاقي واحد يقول له فلان ما تيجي معايا المصلحة دي أصل أنت بتفهم أكثر مني أصل أنا بخاف تعالَ ذاكر لي، أصل عاوز اشتري عربية تعالَ فاصل معايا تعالَ قل لي حلوة ولا وحشة.. فيه شاب كده دايماً حركي بيفهم في كل حاجة هنيئاً له الشخص ده، ده كل مشوار تلاقيه معاك كل حوار تلاقيه سادد رغم أنه ممكن يكون يدوب بيصلي بس في حوائج الناس خطير فهذا يكون أجره كبير أوي عند

ربنا - سبحانه وتعالى- إذا أحتسب الأجر، له أجر أفضل من
الاعتكاف في مسجد النبي عليه الصلاة والسلام، وله أجر حجة
وعمرة في كل مشوار يقضيه لكل أخ من إخوانه.

■ السبب الثامن: بر الوالدين.

عن أنس قال:

(أتى رجلٌ رسولَ الله صَلَّى الله عليه وسلَّم قال إنِّي أشتَهِى
الجهادَ ولا أقدرُ عليه قال هل بقي من والدَيْك أحدٌ قال أمِّي
قال قابِلِ الله في برِّها فإذا فعلتَ ذلك فأنت حاجٌّ ومعتَمِرٌ
ومجاهدٌ).

ربنا يبارك في أمهاتنا يا رب، فأنت حاج، ومعتمر ومجاهد، إذا
رضيت عنك أمك!

وكذلك الأب لما سأله في الأول:- هل في حد منهم عايش؟، فلو كان
الأب كمان عايش كان هينفع معه نفس الشيء، نفس الأجر ده
للأب.

سبحان الله، من يسعى في رضا الأم، وفي رضا الأب له أجر الحج
والعمرة والجهاد!

ينفع بقى تاخذوا الكلام اللي أنا قلته ده تقولوه في كلمة، تقولوه في
مسجد، تقوليه في دار، كده يعني حاجات حلوة تساعدكوا.

■ السبب التاسع: حضور مجالس العلم.

عن أبي امامة عن النبي صلى الله عليه وسلم قال: (من غدا إلى
مسجدٍ لا يريدُ إلا أن يتعلَّم خيراً أو يُعلِّمَه، كان له كأجرِ حاجٍّ،
تماماً حجَّته)؛ سواء بيتعلم أو يعلم.

وده يستوي فيه النساء والرجال، لأن هنا اللي رايحة مش فكرة "صلاة الجماعة" بقى، هي صلاتها في بيتها أفضل من صلاة المسجد، لكن رايحة "لمجلس علم"، فتكون لها بإذن الله نفس أجر الرجل.

■ **السبب العاشر:** آخر حاجة بقى اللي قلت لكم هخليها دي للنساء في الآخر، وده يعني خصوصاً للمرأة المتزوجة.

يلا بنا، كل البنات يقولوا الحديث ده، عشان الحديث ده "هتفرحوا" به قوي، وممكن في كثير مش عارفينه.

عن أسماء بنت يزيد الانصارية: أتت النبي صلى الله عليه وسلم، قالت بأبي أنت وأمي يا رسول الله، الله أعلم الظاهر إن الأجر اللي فات ده لازم يكون الدرس في المسجد، وطبعا دروس الأون لاين لها أجر كبير، بس مآذنش إن لها نفس الأجر، دي من بركة المساجد، ربنا يرجعنا المساجد يا رب.

المهم إن أسماء بنت يزيد قالت للرسول عليه الصلاة والسلام: بأبي أنت وأمي، إني وافدة النساء إليك، وأعلم أنه ما من امرأة كائنة في شرق ولا غرب سمعت بمخرجي هذا أو لم تسمع إلا وهي على مثل رأيي.

يعني اللي بعتوني، أو اللي مبعنونيش وكل العالم، وكل المسلمات عندهم نفس السؤال اللي أنا هسأله لك دلوقتي ده.

قالت:- إن الله بعثك بالحق إلى الرجال والنساء، فأمننا بك وبإلهك، وإنا معشر النساء محصورات، مقصورات.

كلكم تبصوا النساء اللي سألتني على أجر "صلاة الجماعة"، الحديث أهو جاي لك، اللي سألتني على أجر الذهاب للمسجد، والفجر، والشروق.

كله أهو بيتكلموا في حقة:- محصورات، مقصورات، قواعد
بيوتكم، ومقضى شهواتكم، وحاملات أولادكم، وأنتم معشر
الرجال، فضلتم علينا، أهو بص بقى الحاجات اللي فات في
اللايف أهو اللي سألته عليها.

فضلتم علينا بالجمعة والجماعات، كل الأحاديث اللي في فضل
الجمعة والجماعات دي للرجال، لأنها بتقول إنكم فضلتم علينا،
يبقى الأحاديث اللي كانت جت في فضل الجمعة والجماعات هي
تختص بالرجال ابتداء فضلتم علينا بالجمعة والجماعات.

طبعا صلاة المرأة في بيتها احنا قلنا قد تكون أفضل من ذلك، لكن
هي برضو بتتكلم أنتم فضلتم علينا بالجمعة والجماعات وعبادة
المرضى، وشهود الجنائز والحج بعد الحج، احنا لازم محرم
فمش بنعرف نطلع يعني كثير.

وفضل من ذلك الجهاد في سبيل الله، وإن رجل منكم إذا خرج
حاجاً أو معتمراً أو مرابطاً حفظنا لكم الأموال، وغزلنا لكم
الثياب، وربينا لكم الأولاد، فما نشارككم في الأجر يا رسول
الله، لنا إيه بقى بعد كل ده؟

وأنا اقعد في البيت أغسل وأكنس وأربي عيال وأخيظ، وأنتم تاخدوا
أجر الحاج وتاخدوا أجر العمرة وتاخدوا أجر الجمعة والجماعات،
كل الستات باعتين لي ببسألوا السؤال ده، عايزين نعرف إيه الكلام؟
احنا فين من الكلام ده؟

فالتفت النبي صلى الله عليه وسلم إلى أصحابه، وقال هل
سمعتم امرأة قط أحسن من مسألتها في أمر دينها من هذه؟

عمركم سمعتوا ست بتتكلم كلام جميل كده؟

بص لتطيب الخواطر يا جماعة قبل ما يجاوبها أصلاً أثنى عليها،
ممكن واحد زي ده واحد تاني يقول إزاي تتكلمي كده عيب وما

تتكلميش كده ده الرسول وما ينفعش، لا بالعكس ده الأول طيب
خاطرها، وحسبها إن كلامك حق وتتكلمي زي ما أنت عايزة
وليكي مقال وحقك تتكلمي وفعلأ كلامك له وجاهة، بل كلامك
جميل ومرتب ومنظم وما شاء الله عليك، جبر خواطر يا جماعة،
طيب خطرها قبل حتى ما يجاوب.

قول معروف ومغفرة.

فقالت هل سمعتم مقالة امرأة قط أحسن من مسألتها في أمر
دينها من هذه؟

فقال يا رسول الله ما ظننا أن امرأة تهتدي إلى مثل هذا، ما
كناش متخيلين في امرأة فصيحة للدرجة دي، فالتفت النبي صلى
الله عليه وسلم إلى المرأة ثم قال اسمعوا يا بنات اسمعوا
انصرفي أيتها المرأة واعلمي من خلفك من النساء من النساء
إن حسن تبعل إحداكن لزوجها، وطلبها مرضاته، واتباعها
موافقته، يعني ما يحب طالما مش ليس في معصية الله تعدل ذلك
كله، تعدل ذلك كله، فأدبرت المرأة وهي تهلل وتكبر استبشاراً.

فدي المرأة المتزوجة، واخذ بالك المرأة لها دايمأ حاجة عندنا، طب
واحد تقول لي طبعاً أنا مش متجوزة يبقى عندها أم بقى لسه أمك
وبتخدمها يبقى أنت تبع بر الوالدين، تبع النقطة بتاعة بر الوالدين.

طب أنا بقى أمي مثلاً لا قدر الله الأبوين متوفين وبتاع أقضي
حوائج الناس، أصدقي في طلب الحج، هتلاقي نفسك في ثلاثة
خمسة ستة من العشرة اللي أنا قلتهم، لازم كل واحد فينا هيتلاقي
نفسه في خمسة ستة على الأقل من العشرة اللي أنا قلتهم.

ومش ممكن حد هيجي معنا عشرة يعني ما هو لازم في حاجات
للنساء وحاجات للرجال وحاجات مشتركة بس حاول.

أنا النهاردة فتحت لك أبواب، تعالوا نسرد العشرة بقى
طبعاً اللي ما اتجوزتش تنوي كده، إن شاء الله كلكم هتجوزوا،
ولما تتجوزي إن شاء الله تعملي كده، وعلى ما تتجوزي اشتغلي في
قضاء حوائج الناس في صدق النية في بر الوالدين.

العشرة أسباب:

1. صدق النية.
2. محافظه على صلاة الفريضة في المسجد.
3. صلاة الفجر في جماعة ثم الجلوس حتى تطلع الشمس وصلاة ركعتين.
4. عمرة في رمضان، اللي تقدر تعمل عمرة في رمضان.
5. المحافظة على الأذكار بعد الصلوات المكتوبة.
6. التبكير إلى صلاة الجمعة.
7. قضاء حوائج الناس.
8. بر الوالدين.
9. حضور مجالس العلم.
10. دي للنساء حسن تبعل الزوجة لزوجها وطلب الزوجة لرضا الزوج، وده رسالة نرد بها بتوع النسوية اللي بقى مش عاجبها لا إزاي أطيع زوجي أعمل له كوباية شاي ليه وكوباية الشاي دي فرض ولا سنة وأنا سمعت شيخ بيقول ما يجبش على المرأة تخدم زوجها وياللا نتخانق على كوباية الشاي ونتخانق على مكوة القميص ونتخانق على مين اللي ينشر الغسيل، يا جماعة مش كده، اطلعوا من الأفكار السيئة دي.

ربنا يا جماعة بيدينا أجور، الرجل له دور كبير لازم يؤديه حق والمرأة لها دور تؤديه، مستحب ولا واجب مش دي قصتنا، احنا

بنتكلم في أجر ضخم جداً زي ما أنتم شفتهم، يعدل أجور الحج
والعمرة والكلام ده، بل يعدل ذلك كله الجمعة والجمعات والجهاد
والحج والعمرة.

بس كده، خلص لايف، إيه رأيكم النهاردة؟

لايف حلو؟

عجبكم؟

ربنا يبارك فيكم، أنا سعيد إننا اتقابلنا النهاردة، اه غالباً يوم الاثنين
الجاي هيبقى في العيد ف هنأجل اللايف بتاع الاثنين الجاي، وإن
شاء الله نبدأ الاثنين اللي بعد القادم.

أحبكم في الله يا رب يبارك فيكم انشروا اللايف ده جداً وفرغوه
اكتبوا الحاجات العشرة دي ويا ريت تعملوا شير له ويا ريت
تاخدوا الموضوع ده كله وتحكوه للناس تقولوه في دار في مسجد
في لقاء في تسجيل في أي حاجة كلنا هنستفيد ونتعلم ويبقى نشرت
وعلم وخير.

ربنا يبارك فيكم جزاكم الله كل خير سلام عليكم ورحمة الله، كل
عام وأنتم بخير، تقبل الله منا ومنكم صالح الأعمال، سلام عليكم.
كان في دورة راسخ يا ريت تكونوا اشتركتوا فيها، دورة راسخ،
ماتنسوش تشتركوا فيها، هتلاقوا الروابط بتاعتها تحت انزلوا في
الصفحة هتلاقوها تحت، جزاكم الله خيراً، سلام عليكم.

لا تنسونا من صالح الدعاء.